

«ԼՐԱՔԵՐ ՀԱՍԱՐԱԿԱԿԱՆ ԳԻՏՈՒԹՅՈՒՆՆԵՐԻ» ՀԱՆԴԵՍԸ 80 ՏԱՐԵԿԱՆ Է

«Լրաքեր հասարակական գիտությունների» հանդեսը բոլորեց իր 80-րդ տարին: Լինելով Հայաստանի գիտությունների ակադեմիայի անդրանիկ և ամենաերկարակյաց պարբերականը՝ այն տասնամյակներ շարունակ կրել է հայ հումանիտար և հասարակագիտական մտքի ջահը, որն այսօր էլ հաջողությամբ տանում է առաջ:

Միջմասնագիտական և բազմալեզու հանդեսը հիմնադրվել է 1940 թ., նրա էջերում աճել և հասունացել են հայագետների և հասարակագետների բազմաթիվ սերունդներ: 1940-1943 թթ. պարբերականը հրատարակվել է որպես ԽՍՀՄ ԳԱ նախագահության հայկական մասնաճյուղի՝ Արմֆանի հասարակական և բնական գիտությունների «Տեղեկագիր», 1943-1965 թթ.՝ Հայաստանի ԳԱ «Տեղեկագիր հասարակական գիտությունների»: 1966 թ. ամսագիրը վերանվանվել է «Լրաքեր հասարակական գիտությունների»: 1940-1947 թթ. այն լույս է տեսել անկանոն պարբերականությամբ, 1948-1990 թթ. ունեցել է ամենամսյա, 1991 թ.՝ երկամսյա, 1992-1995 թթ.՝ եռամսյա հրատարակություն, իսկ 1996-ից առ այսօր քառամսյա պարբերական է: Տարբեր ժամանակներում «Լրաքերի» գլխավոր խմբագիրներ են եղել անվանի գիտնականներ Հ. Օրբելին (հիմնադիր), Ս. Կարապետյանը, Հ. Բարիկյանը, Խ. Մոմջանը, Մ. Ներսիսյանը, Ա. Հովհաննիսյանը, Ծ. Աղայանը, Գ. Սյրեփանյանը, Հ. Ասլանյանը, Գ. Արովը, Հ. Ինճիկյանը, Վ. Միքայելյանը, Ա. Խառապյանը: 2017 թ. վերջից հանդեսի գլխավոր խմբագիրն է Պ. Ավետիսյանը:

Ի տարբերություն գիտական այլ՝ ավելի նեղ բնագավառներ ներկայացնող պարբերականների, «Լրաքերն» իր բնույթով միջմասնագիտական է, ընդգրկում է հասարակական և հումանիտար գիտությունների ողջ դաշտը՝ պատմություն, փիլիսոփայություն, սոցիոլոգիա, իրավագիտություն, քաղաքագիտություն, տնտեսագիտություն, լեզվաբանություն, գրականագիտություն, արվեստագիտություն, հոգեբանություն, մանկավարժություն, մատենագիտություն, կրոնագիտություն, ազգագրություն, բանագիտություն, հնագիտություն: Հանդեսի ծավալի էական մասն են կազմում հայագիտական ուսումնասիրությունները՝ առանց բովանդակային, ժամանակագրական և տարածական սահմանափակությունների: Հանդեսը լույս է ընծայում հոդվածներ, հաղորդումներ, հրապարակումներ, գրախոսականներ, հորեյանականներ և հիշատակի խոսքեր:

Հասարակագիտական խնդիրների ներկայացման, քննարկումների և բանավեճերի համար «Լրաքերը» մշտապես էջեր է հատկացրել ոչ միայն

հայրենական, այլև սփյուռքահայ և օտարազգի գիտնականների համար: Տպագրելով հիմնականում հայկական գիտության վաստակավոր գործիչների աշխատանքներ՝ միևնույն ժամանակ խրախուսել է երիտասարդ գիտնականների նորարարական մոտեցումները:

Հենվելով հայ հասարակագիտական մտքի բազմադարյա ավանդույթների և փորձի վրա՝ հանդեսը ձգտել և ձգտում է հրապարակել միջազգային չափորոշիչներին համապատասխանող գիտական հոդվածներ: Հանդեսի խմբագրակազմը առաջնորդվում է գիտական աշխատանքների հեղինակային իրավունքի պահպանման՝ ՀՀ և միջազգային ընդունված չափորոշիչներով՝ չխախտելով գիտական էթիկան և ապահովելով որակը:

Ինչպես վերը նշեցինք, «Լրաբերում» տպագրվող նյութերի մեծագույն մասը վերաբերում է հայոց պատմության և մշակույթի, հայագիտության կարևորագույն խնդիրների լուսաբանմանը: Դրանց թվում հատուկ նշանակություն ունեն հայ ժողովրդի ծագման ու կազմավորման, հայ հին, միջնադարյան ու նոր շրջանի պատմության, լեզվի, գրականության ու արվեստի հարցերը: Հայոց կորուսյալ հայրենիքի՝ Արևմտյան Հայաստանի, Նախիջևանի, Ջավախքի անցյալի ու ներկայի հիմնահարցերը մշտապես եղել են պարբերականի ուշադրության կենտրոնում: Հանդեսը, լինելով հայ ժողովրդի կենսական խնդիրների խոսափողը, արժարժում է Հայրենիքին և Սփյուռքին հուզող առաջնային հարցերը: Անհրաժեշտ է նշել նաև այն կարևոր իրողությունը, որ հանրապետական գիտական մամուլում «Լրաբերն» առաջինն էր, որ չնայած հասկանալի բարդություններին, սկսած 1988 թ.՝ նախաձեռնեց Արցախի խնդրի, հայ հասարակական-քաղաքական կուսակցությունների պատմությանն ու գործունեությանը վերաբերող հոդվածների տպագրությունը:

Այսպիսով, տասնամյակներ շարունակ պարբերականը լայն հասարակայնությանը ծանոթացրել է մեր ակադեմիական գիտությանը: Անցնելով գիտահրատարակչական մեծ ճանապարհ՝ «Լրաբերը» այսօր էլ շարունակում է իր առաքելությունը:

Շնորհավորում ենք հանդեսի խմբագրական աշխատակազմին ու խորհրդին, հեղինակներին ու ընթերցողներին, ընդհանրապես մեզ բոլորիս այս կարևոր հոբելյանի կապակցությամբ՝ «Լրաբերին» ու նրա աշխատակիցներին մաղթելով երկար տարիների կյանք և նշանակալի ձեռքբերումներ:

ՊԱՎԵԼ ԱՎԵՏԻՍՅԱՆ

ՀՀ ԳԱԱ թղթակից անդամ